

**Kata Pengalo – ngalo ras Momo**

=====

Turang ras senina i bas Tuhanta Jesus Kristus, selaku serayan Tuhan, ikataken kami mejuah-juah ras Selamat wari Minggu man banta kerina. Man bandu kekelengen kami si sekali enda denga erkebaktin i bas gerejanta enda, ikataken kami mejuah-juah. Kerehenndu nambahi keriahen man banta kerina. I bas bena kebaktinta mari dage sidengkehken momo kerna perdalanen perpulungen Tuhan, bage pe rencana pelayanen gerejanta ku bas wari-wari si reh enda ([Ngogeken Momo](#)).

## Kata Penaruh

=====

Turang ras senina i bas kekelengen Tuhanta Jesus Kristus, Minggu enda igelari Minggu Mamre, si mabai kita ngidah kegeluhen Mamre selaku kalak si ipilih Dibata guna mpetangkas pasu-pasuNa man doni enda. Selaku bapa itengah jabu, Mamre ipilih jadi imam guna mabai isi jabu erkiniteken man Dibata seh maka kerina isi jabu ndatken kesangapen ras kemalemen ate. Mamre pe ipake Dibata gelah erdiate ras erpemere si maba kiniulin ku tengah-tengah gereja ras masyarakat.

### Erkata Lonceng

*(Perp. Tedis)*

### Rende

**KEE No. 14 : 1, 2, 3**

*(Serayan Kebaktin Bengket Ku Mimbar)*

**Kebaktin Minggu, 23 Agustus 2026**  
**Minggu XII Kenca Trinitas / Minggu Mamre**

|          |                                                                                                                                                                                                                                                                                                                                                                                                             |
|----------|-------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------|
| <b>3</b> | <b>Votum – Salam</b> <i>(Perp. Tedis)</i>                                                                                                                                                                                                                                                                                                                                                                   |
| L        | I bas gelar Dibata Bapa si nepa manusia sentudu ras tempasNa, i bas gelar AnakNa Jesus Kristus si jadi usihen man manusia, ras i bas gelar Kesah si Badia sumbul gegeh ras kepentaren.<br>Perkuah ate ras dame i bas Dibata Bapa ras i bas Tuhan Jesus Kristus nari, i bas kerembaken Kesah si Badia ras kita kerina gelah. Amin.                                                                           |
| P        | Amin ..... Amin ..... Amin ..... <i>(iendeken)</i>                                                                                                                                                                                                                                                                                                                                                          |
| <b>4</b> | <b>Berita Kerna Perbahanen ras Sura-sura Dibata (Invocatio)</b>                                                                                                                                                                                                                                                                                                                                             |
| L        | “Untung kap anak si erbapaken kalak bujur, dengen si ndalanken perbahanen si bujur” (Kuan-kuanen 20 : 7).<br><br>Mari sipuji Dibata erkiteken perbahanenNa, alu ngendeken :<br><b>KEE No. 56 : 1, 2, 3</b>                                                                                                                                                                                                  |
| <b>5</b> | <b>Kinata Kerna Kinilangasupen I bas Ndalanken Pedah Dibata</b> <i>(Perp. Kundul)</i>                                                                                                                                                                                                                                                                                                                       |
| L        | Turang ras senina, alu perkuah ateNa, Dibata enggo nehi padanNa alu mereken pasu-pasuNa man banta manusia. Enggo nge kita ngergaken perkuah ateNa e itengah-tengah geluhta ?<br><br><i>(Paksa Teneng)</i>                                                                                                                                                                                                   |
| L        | Dibata nggo mereken tanggungjawab si mbelin man Mamre selaku bapa i tengah-tengah jabu, guna mabai jabuna gelah tetap setia i bas perkuah ate Dibata. Enggo nge ndia idalanken Mamre ?                                                                                                                                                                                                                      |
| Mamre    | Ngaku kami Tuhan, megati kami lupa nandangi pendiloNdu jadi bapa i tengah jabu. Megati la kami ncidahken tempasNdu, subuk i bas pengerana ras perbahanen. Pengerana si arusna mpegegehi pusuh, megati erban kalak ngelabuh, perbahanen kami si arusna jadi usihen, megati jadi batu antuken. Selaku imam, megati kami la ngasup mabai jabu kami guna rembak ras Kam. Tuhan, alemi dengen pegegehi min kami. |

|            |                                                                                                                                                                                                                                                                                                                                                                                                                                                                                                                                                                                                                                                                                                                                                                       |
|------------|-----------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------|
| L          | I bas kita tole nggejapken kinilangasupenta ndalanken pedah Dibata, mari kita rende i bas : <b>KEE No. 362 : 1, 2, 3</b>                                                                                                                                                                                                                                                                                                                                                                                                                                                                                                                                                                                                                                              |
| <b>6</b>   | <b>Padan Dibata Si Mpegegehi Mamre</b> <i>(Perp. Tedis)</i>                                                                                                                                                                                                                                                                                                                                                                                                                                                                                                                                                                                                                                                                                                           |
| L          | <p>La ngena ate Dibata kematen kalak si munuh bana i bas dosana, tapi ngena ate Tuhan nandangi kalak si igejapna salah lepakna, si ceda atena kerna dosana dingén jera. Emaka selaku persuruhan Dibata, aku nehken KataNa man banta kerina singgejap ras ngakuken dosana, si tek nandangi keleng ate Dibata, niNa :</p> <p><i>“Desken remang erpagi-pagi, dosandu enggo Kulesapken, janah salahndu pe enggo Kusasap desken embun. E maka mulihlah kempak Aku, sabap Aku kap Penebusndu.”</i> Aku tetap nginget padanKu man bandu ras man kerina kesusurenndu ersundut-sundut janah perpadanen e tetap rasa lalap. Aku jadi Dibatandu ras jadi Dibata sinursurndu” (Jesaya 44 : 22; Kejadin 17 : 7).</p> <p>Mari sipuji Dibata arah : <b>KEE No. 269 : 1, 2, 3</b></p> |
| <b>7</b>   | <b>Kata Dibata</b> <i>(Perp. Kundul)</i>                                                                                                                                                                                                                                                                                                                                                                                                                                                                                                                                                                                                                                                                                                                              |
| a          | <p>Marilah sibegiken Kata Dibata si man ogenken ibas Minggu enda sini ibuat ibas Kitab <b>Lukas 15 : 11 - 24</b>. Mari siogeken secara pegancih. Sibenaken pengogenta .....</p> <p style="text-align: center;"><b><u>Anak si bene</u></b></p>                                                                                                                                                                                                                                                                                                                                                                                                                                                                                                                         |
| 15:11<br>L | Iterusken Jesus ngerana nina, “Lit me sekalak perbapan, dua kalak anakna dilaki.                                                                                                                                                                                                                                                                                                                                                                                                                                                                                                                                                                                                                                                                                      |
| 15:12<br>P | Nina si nguda man bapana, ‘O bapa, bereken genduari man bangku erta-erta sikerajangenku.’ E maka ibagi bapana erta-erta e man anakna duana.                                                                                                                                                                                                                                                                                                                                                                                                                                                                                                                                                                                                                           |
| 15:13<br>L | Kenca piga-piga wari, idayaken anak si nguda e me sikerajangenna, jenari lawes ia ku negeri si ndauh. I je isia-siakenna duitna e.                                                                                                                                                                                                                                                                                                                                                                                                                                                                                                                                                                                                                                    |
| 15:14<br>P | Kenca ker i bahanna duitna e, jadi me kelihen i bas negeri e, janah mulai me iakapna suhsah.                                                                                                                                                                                                                                                                                                                                                                                                                                                                                                                                                                                                                                                                          |
| 15:15<br>L | E maka erdahin ia ras sekalak anak negeri e. Isuruhna ia ku juma ermakan babi.                                                                                                                                                                                                                                                                                                                                                                                                                                                                                                                                                                                                                                                                                        |

|            |                                                                                                                                                                                                              |
|------------|--------------------------------------------------------------------------------------------------------------------------------------------------------------------------------------------------------------|
| 15:16<br>P | Nakan iba-iba babi e pe meriah nge min ukurna manca, tapi ise pe la mereken kai pe man bana.                                                                                                                 |
| 15:17<br>L | Dungna rukur ia, janah nina i bas ukurna, ‘Kerina si erdahin bapangku riba-iba panganna, tapi aku i jenda menam mate kelihen.                                                                                |
| 15:18<br>P | Laweslah aku ndahi bapangku janah ningku man bana, O bapa, aku enggo erdosa man Dibata dengen ersalah man bandu.                                                                                             |
| 15:19<br>L | Lanai metunggung pe aku igelari anakndu.’                                                                                                                                                                    |
| 15:20<br>P | E maka berkat ia ndahi bapana. Ndauh denga pe ia i rumah nari enggo idah bapana ia. Mekuah ate bapana, e maka kiam ia ngayakisa, idakepna janah iemainna.                                                    |
| 15:21<br>L | Nina anakna e man bana, ‘O bapa, aku enggo erdosa man Dibata dengen ersalah man bandu. Lanai metunggung pe aku igelari anakndu.’                                                                             |
| 15:22<br>P | Tapi idilo bapana juak-juakna nina, ‘Pedasken baba ku jenda uis si mejilena janah pakeken man bana! Tamaken cincin ku jari-jarina janah sepatui ia.                                                          |
| 15:23<br>L | Jenari geleh sada anak lembu si mburna, gelah erbahan pesta man-man kita.                                                                                                                                    |
| 15:24<br>P | Sabap anakku enda nai enggo mate, tapi genduari enggo nggeluh mulihi; ia enggo bene, tapi genduari mulihken ia.’ E maka ibenakenna erpesta ras ermeriah-meriah.                                              |
|            | <p>Ketuahen me kalak si megiken kata Dibata dengen si makekenca i bas geluhna si teptep wari, Haleluya.</p> <p>Ialoi perpulungen alu ngendeken :</p> <p><i>Haleluya .... Haleluya .... Haleluya ....</i></p> |

|          |                                                                                                                                                                                                                                                                                                                                                                                                                                                                                                                                                                                                                                                                                                                                                |
|----------|------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------|
| b        | Ertoto guna Khotbah                                                                                                                                                                                                                                                                                                                                                                                                                                                                                                                                                                                                                                                                                                                            |
| c        | Khotbah : <b>Masmur 128 : 1 - 6.</b><br>Tema : <b>“Bapa Si Malang Man Tuhan”</b>                                                                                                                                                                                                                                                                                                                                                                                                                                                                                                                                                                                                                                                               |
| d        | Ertoto kenca khotbah                                                                                                                                                                                                                                                                                                                                                                                                                                                                                                                                                                                                                                                                                                                           |
| <b>8</b> | <b>Pengakun Kiniteken</b> <i>(Perp. Tedis)</i>                                                                                                                                                                                                                                                                                                                                                                                                                                                                                                                                                                                                                                                                                                 |
|          | <p>Aku tek man Dibata Bapa si la ersibar kuasaNa, si nepa langit ras doni.</p> <p>Aku tek man Yesus Kristus anakNa si Tonggal Tuhanta, si jadi arah Kesah si Badia, tubuh i dur singuda-nguda nari si so keliamen, tergelar si Maria, si ngenanami kiniseran sangana pemerintahen Pontius Pilatus, nipakuken ku kayu persilang, mate je nari ikuburken, nusur ku doni kematen, peteluwariken enggo keke ibas si mate nari, nangkih ku surga, perkundulna arah kemuhen Dibata Bapa si la ersibar KuasaNa, je nari reh me IA pagi ngeranaken si nggeluh ras si enggo mate.</p> <p>Aku tek man Kesah si Badia, janah lit sada Gereja si Badia, persadan kalak si Badia, pengalemi dosa, kinikeken kula, kegeluhen si rasa lalap.</p> <p>Amin.</p> |
| <b>9</b> | <b>Persembahen Pengataken Bujur</b> <i>(Perp. Kundul)</i>                                                                                                                                                                                                                                                                                                                                                                                                                                                                                                                                                                                                                                                                                      |
| L        | <p>Seh paksana kita nehken persembahen pengataken bujurta man Dibata. Kata Dibata si mpegegehi kita guna nehken persembahennta :</p> <p><i>“O senina-seninangku, nginget perkuah ate Dibata si mbelin si isehkenNa man banta, kupindo man bandu: Endeskenlah kulandu man Dibata saja selaku persembahen si nggeluh rikutken si ngena ateNa. Sabap bage me arusna kam ersembah man Dibata sue ras biakndu selaku mahluk si rukur” (Roma 12 : 1).</i></p> <p>Iherta ngendesken persembahen sipuji Tuhan alu ngendesken :<br/><b>KEE No. 343 : 1, 2, 3</b></p> <p>Pertoton Persembahen ras Syafaat</p>                                                                                                                                            |

|           |                                                                                                                                                                                                                                                                                                                                                                                                 |
|-----------|-------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------|
| <b>10</b> | <b>Perpadanen Man Dibata</b> <i>(Perp. Tedis)</i>                                                                                                                                                                                                                                                                                                                                               |
| L         | Turang ras senina, Dibata ndilo Mamre jadi bapa dingen jadi imam, guna mabai isi jabu erkemalangen man Dibata.                                                                                                                                                                                                                                                                                  |
| Mamre     | Erpadan kami Tuhan, ate kami ertanggungjawab jadi bapa, ras jadi imam i tengah jabu.                                                                                                                                                                                                                                                                                                            |
| L         | Tole pe Dibata mereken tanggungjawab terbelinen, eme maba kiniulin kutengah-tengah gereja ras masyarakat.                                                                                                                                                                                                                                                                                       |
| Mamre     | Erpadan kami Tuhan, makeken diri kami, guna maba kiniulinNdu i doni enda.                                                                                                                                                                                                                                                                                                                       |
| P         | Kami pe erpadan Tuhan, ngergaken ras nampati mamre gelah ngasup nehken singena ate Dibata.                                                                                                                                                                                                                                                                                                      |
| L         | I bas mpeteguhi perpadanenta man Dibata, mari ras kita rende arah : <b>KEE No. 295 : 1, 2, 3</b>                                                                                                                                                                                                                                                                                                |
| <b>11</b> | <b>Pertoton Tuhan</b>                                                                                                                                                                                                                                                                                                                                                                           |
| <b>12</b> | <b>Pengutusen ras Pasu-pasu Dibata</b>                                                                                                                                                                                                                                                                                                                                                          |
| L         | <p>Bengketlah ku bas kegeluhenndu, guna ncidahkan keleng ate Dibata man kerina manusia. Gelah kam setia ras ncikep perpadanenndu ras Dibata, guna mpeteguhi kam ndalanken si e, alokenlah pasu-pasu idur Dibata nari :</p> <p><i>“Kupas-pasu, Kukawali, dingen Kupegegehi kam guna ncikep perpadanen e ras bahanlah rikut singena ateKu. Aku tetap ras kam seh ku kedungen jaman” Amin.</i></p> |
|           | <p>Ialoi perpulungen alu ngendeken :</p> <p>A..min</p> <p>A....min</p> <p>A .....min</p>                                                                                                                                                                                                                                                                                                        |
|           | <b><i>SELAMAT HARI MINGGU/SYALOOM....</i></b>                                                                                                                                                                                                                                                                                                                                                   |